

Thursday, February 26, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



ASSEMBLY : BUDGET

Finance changtu Chief Minister Pu Lalduhoma'n kum 2026-27 Financial Year-a Mizoram sum ruahman cheng vaibelchhe 17,076 leh nuai 92 chu Assembly House a a pharh.

Kum kal lai 2025-26 budget aiin kumin budget hi cheng vaibelchhe 3057 nuai 8 in a tam zawk a, a punna hi za zela 14.94 a ni a, Budget Estimate 2024-25 zinga cheng vaibelchhe 15,621 leh nuai 48 chu house a pawm ngai a ni.

Pu Lalduhoma hian kumin Financial Year kal laia sum hman ruahman belhna Supplementary Demands for Grants 2025-2026 cheng vaibelchhe 3724 leh nuai 25 chu a pharh nghal bawk a. Sorkar inrelbawlna senso, sorkar hnathawk hlawh leh pension bakah hmasawna thawhna tur atana sum hman tur ruahman (revenue expenditure) hi cheng vaibelchhe 17,127 leh nuai 30 a ni a. Budget pumpui atanga chhutin za zela 82.53 a ni. Mipui hmasawna atana sum ruahman (capital expenditure) atan cheng vaibelchhe 2658 leh nuai 56 dah a ni a, hei hi sum ruahman zawng zawng atanga chhutin za zela 17.46 a ni.

Chief Minister chuan sawrkar laipui hmahlir Viksit Bharat tih hlawhtlinna kawnga a tam theih ang ber thawh ve an duh a ti a, kum 2047 ah India ram pumpui dehchhuah GSDP atanga 1% chu state atanga thawhchhuah ve an tum tih sawiin thil thar siamna leh tualchhunga tharchhuah tihpun lama hmasawna chu an hmahlir pawimawh anih thu a sawi.

Chief Minister chuan chhiah lak lai mek tih pun tumna a awmlo tih sawiin Chhiah thar lak tumna a awmlo a ti a, Sawrkarin an dinhmun dik tak aia sang GSDP figure an nei thin chu tha anti lo a ti a, Tlahniam ta angin lan phah dawn mahse huaisen taka figure dik thei ang ber hmanga inteh a, nihna dik phochhuah an duh avangin kum 2026-27 GSDP chu cheng vaibelchhe 43817 leh nuai 9 anga chhut ani a ti a, kum kal mek atangin cheng vaibelchhe 4290 leh nuai 67 in a pung tih sawiin a punna chu za zela 10.85% ani tih a sawi.

Pu Lalduhoma chuan ZPM sorkar flagship programme (Bana Kaih ruahmanna) atan cheng vaibelchhe 350 dah a ni a ti aa, he ta tanga cheng vaibelchhe 150 chu thlai thlan bik leina atan a bik taka dah a ni tih sawiin MLA 40-te'n MLA Local Area Development Fund atana an hman tur cheng vaibelchhe 80 dah a ni tih sawiin kawng siamthatna atan cheng vaibelchhe 183 leh nuai 25 dah ani a ti bawk.

Chief Minister chuan State-ina hna pawimawh bik a kalpuina tur State Priority Project atan cheng vaibelchhe 100 dah a ni a ti a, Mizoram Universal Healthcare Scheme (MUHCS) bill pekna turin cheng vaibelchhe 130 an dah tih sawiin Social Welfare hnuai Ruihhlo ngaite enkawlna Home chhawmdawl nan cheng vaibelchhe 70 dah a ni a ti bawk.

Pu Lalduhoma chuan Power & Electricity Department hnuai h kawlphehtha leina atan cheng vaibelchhe 550 dah ani a ti a, ruihhlo dona hmalakna Anti Narcotic Activities atan head thar hawngin cheng nuai 40 dah a ni a ti bawk.



DP&AR MINISTER

DP&AR changtu Minister Pu K. Sapdanga'n Mizoram Civil Service Junior grade Post ruak 32 awm chu a tahtawlh a hnawh khat turin hma an lak mek thu a sawi.

Assembly Session kal mekah DP&AR Minister chuan he thu hi sawiin, Mizoram Sorkarah Mizoram Civil Service Junior grade Post 82 awmah post 50 luahkhah a ni tawh a, Post ruak 32 awm tih sawiin, post ruak te chu a tahtawlh hnawh khah tum a ni a, engemawzat dah tur peih tawh niin, kumtharah pawh chhunzawm zel tum a ni tih a sawi.

Zawh belhna chhangin Minister chuan sorkar danah cadre post chu mi in deputation-a a chhuahsan chuan a chhuahsan post ruak chu midangin promotion hmangin an luah thei a, a chhuahsan tu chu Supertime A la ni tho siin, a hmun ruak hnawhkhattu pawh Supertime A a nih bawk avangin Grade sang lamah post awm zat aia a luahtu an tam phah niin a sawi bawk a ni.

(



KTP GENERAL CONFERENCE

Kristian Thalai Pawl (KTP) General Conference 2026 hmang turin vawiin khan khaw hrang hrang atangin Palaiten Saitual an pan tan.

KTP General Conference vawi 61-na chu zanin hian Saitualah tan a ni dawn a, vawiin hian palai nawlpuiin Saitual an pan tan a, nizan khan Conference neihna tur Saitual Public Playground-a Pandal chu Pathian hnena hlanna hun inkhawm neih niin, Organising Committee Chairman Rev Thangchhuaka chuan Pathian hnenah a hlan a, Saitual bialtu MLA Prof. Lalnilawma chuan Souvenir "Báwk" tih a tlangzarh a ni.

Reception Office chhinchhiah danin Vawiin chhun dar 1 thleng khan Palai 5000 chuang an thleng tawh a, Reception website atanga palai kal tur in report hi mi 25,000 chuang an awm tawh a, zan lam thlengin palai lo dawnsawn hna hi buaipui a ni ang.

Saitual KTP General Conference thleng tur hian Saitual khaw mipuite an tangruah hle a, Pandal Hlanna inkhawmah pawh hian Presbyterian kohhran mai bakah Seventhday Adventist, ICI, Baptist Church of Mizoram leh Salvation Army-te'n chanvo an nei a ni.



AGRICULTURE MINISTER : FERTILIZER

Agriculture Minister Pu PC. Vanlalruata'n Mizorama loneituten Fertilizer dukhawp lei tur an hmuh loh laiin Myanmar ah thawn chhoh thin nia sawi chu thudik a nih thu a sawi.

Nimin Assembly Session-a Aizawl West III Bialtu MLA Pu VL Zaithanzama zawhna chhangin, Agriculture Minister chuan India ram chu khawvela mihring tamna ber a nih avangin buh leh bala intodelh a ngai nasa hle a, hei vang hian sorkar laipui chuan Fertilizer subsidy a kalpui a, chumi a nih avang chuan Fertilizer chu dealer ten zaa 10 in an zuar chhuak thin a, zaa 90 vel chu sorkar laipuiin a tum avangin Fertilizer man chu a tlawm hle a. Hei vang hian Myanmar lamah man to zawka hralh chhawn tura thawn chhoh a chakawm hle nia a rin thu a sawi a, Mizorama loneituten Fertilizer dukhawp lei tur an hmuh loh thu chu office lamah pawh an thlen fo tih sawiin, sorkar chuan theihtawp chhuahin Myanmar lama thawn chhoh veng turin hma an la a, a ziaawm tawh hle tih a sawi bawk a ni.

Minister chuan Mizorama Loneituten tlawm zawk leh awlsam zawka Fertilizer lei tur an hmuh theihna turin MAHFED kaltlangin engtik lai pawhin kalpui mek a ni ti a, sorkar chuan theihtawp chhuahin lei tha zawrhna kawngah PMSK hnuaijah cooperative society kaltlang kalpui tum chhoh zel a tum tih a sawi bawk a ni.

